

SANDE 1 SILONG LEN

1. RIT

Lo (Deu) 26:4-10

Akar dapanim: Ia uan nighnizir gavgavimin gun God mikim.

Akar kam, Moses Osirizir Arazibar Akinafarim, o Diuteronomi, an aven iti.

“Eghti ofa gamir gumazim ian dafarimin akirar kam inigh, egh Ikiavira Itir God, ian God, an ofa gamir dakozimin boroghin anetigham. Eghti ia Ikiavira Itir God ian God, an damazimin ia kamaghin mikim, ‘Nan inazir afeziam an Aramian gumazir mam. A uan nguibam ategha tintinibar arua ghua, gin uan adarasi inigha Isipin kantrin ghue, me avirasemezir puvati. Me ikia ghua bar avirasemegha bar gavgafi. Ezi Isipia en apangkuvir puvatigha bar pazavira e gamua, e gamima e men ingangarir gumazir kinibar min ikia bar puvira ingari. Kamaghin amizi, e Ikiavira Itir God, en inazir afeziabar God, an dei. Ezi an en dimdiaba baregha en mizaziba ko ingangarir ekiaba ko dughiar kurar e

batozir kamin gani. Egha Ikiavira Itir God, guizbangira uan gavgavir ekiamin arazarazir gavgavir aviribagh amua mirakelin igharagha garibagh amua, egha bizir kurar igharazibagh amima da me bativizi me bar an atiatingi. Kamaghira a ua Isipin kantrin e nigha azenan ize. Egha en akua kagh iza nguazir kam e ganingi, nguazir kam a bar dera, ezi biziba bar deragha an ikiava aghui. O Ikiavira Itir God, ni uabi na ganingizir nguazir kamin ki datirighin dagher faragha otiviziba asigha da inigha izi.’ Egh ia akirar kam isi Ikiavira Itir God, ian God, an damazimin boroghin anetigh, teviba apirigh an iziam fi.”

Kar Godin Akam.

SAM

Sam 91:1-2, 10-15

Ia akam ikaragh: Ekiam, ni osimtizimin dughiamin nan akuragh.

Gumazim, Godin Bar Pin Itim, deragh an gansi an a bagh mangiti, God deragh an ganam.

A Godin Bar Gavgaviba Itimin boroghin ikiti, God dughuazimin min anevaragham.

Gumazir kam Ikiavira Godin mikim suam,

“Ni nan divazir gavgavimin min itima, ki nin aven uabi moga deravira iti.

Ni nan God. Ki nighnizir gavgavim nirara iti.”

Ia akam ikaragh: Ekiam, ni osimtizimin dughiamin nan akuragh.

Kamaghin, bizir kuratam ni bagh izan kogham.

Arimariar ekiatam nin dipenimin boroghin mangan kogham.

Ni daruamin dughiaabar, Ikiavira Itir God, uan enselba amadaghti me izi ni geghuv nin ganam.

Ia akam ikaragh: Ekiam, ni osimtizimin dughiamin nan akuragh.

Nin dagarimning dagiaba aning mitivan koghsi,
enselba uan agharibar nin suigh ni fegh mangi.
Ni laionba ko, kuruziba ko, laionin igiaba ko,
kuruzir kurar ekiaba dikabinam.

Ia akam ikaragh: Ekiam, ni osimtizimin dughiamin nan akuragh.

God kamagh migia ghaze,
“Gumazir nan ziam gifogha na gifongegha nan poroziba,
ki ua me inigh,
deragh me geghuv men ganam.
Eghti me na ko mikimti, ki me baragham.
Egh osimtizim me batoghti ki me ko ikiva,
ua me inigh ziar ekiam me daningam.

Ia akam ikaragh: Ekiam, ni osimtizimin dughiamin nan akuragh.

2. RIT

Ro 10:8-13

Akar dapanim: E nighnizir gavgavim Kraisin ikia, egha uan nighnizir gavgavimin gun a migei.

Akar kam, akinafarir Pol Romin gumazamiziba baghava an osirizimin aven iti.

Ezi Godin Akinafarim kamaghin migei, “Godin akam bar nin boroghira iti, a nin akatorim ko nin navir averiamin aven iti.” Ka nighnizir gavgavimin akar e ia migeim. Ni uan akamin kamaghin mikim suam, “Iesus a nan Ekiam,” egh uan navir averiamin aven nighnizir gavgavim iki, kamaghin fogh, God Iesus gamizi a mozimin ua dikafi, eghti God nin akurvaghti, ni ikivira ikiam. E fo, ni navir averiamin nighnizir gavgavim Iesusin ikiti, kamaghin God suam, ni nan damazimin dera. Egh uaghan ni uan akatorimin suam, “Iesus nan Ekiam,” eghti God

nin akuraghti, ni ikivira ikiam. Egha Godin Akinafarim kamaghin migei, “Gumazim nighnizir gavgavim Godin ikiva, egh a uabi aghumsighan kogham. Puvati.” Egha Godin Akinafarim ghaze, “Gumaziba bar Ekiamin ziamin diaghti a men akurvagham.” Kamaghin, Godin vamira iti, a bar en Ekiam. Eghti gumazir an deiba, a bar bizir aghuir aviriba men akurvagham. Judaba ko Kantrin Igharazibar Gumaziba, Godin damazimin magh gari.

Kar Godin Akam.

WELKAMIM GUTNIUS

Ekiam Krai Iesus, e nin iziam fa iziar ekiam ni ganidi.

Gumamaziba bretra damiva angamra ikian kogham. Me uaghan Godin akabar gin mangi zurara ikiam.

Ekiam Krai Iesus, e nin iziam fa iziar ekiam ni ganidi.

GUTNIUS

Lu 4:1-13

Akar dapanim: Godin duam Iesus gizivazima, a gumaziba puvatizi naghin 40plan aruebar iti, Satan a gifari.

Ia, Krai Iesusin Akar Aghuir Luk osirizim, a baragh.

Iesus, Godin Duam bar a gizivazima a Jordanin dipam ategha uamatega Galilin Distrighin zui. Ezima Godin Duam a inigha gumaziba itir puvatizir danganimin zui. Ezi Iesus danganir kamin 40 pla arueba ko dimagaribar itima, Satan bizibar a gifari. Iesus dughiar kabar daghetam amezir puvati. Ezima dughiar kaba givazima mitiriam an azi.

Ezima Satan kamaghin a migei, “Ni guizbangira Godin Otarim, ni dagiar kam mikemeghtima a bretin min otogh.”

Ezi Iesus Satan ikaragha ghaze, “Godin Akinafarim kamaghin migei, ‘Gumamaziba daghebara damiva dar gavgavimin ikian kogham.’ ”

Ezi Satan Iesus inigha danganir bar pin itimin ghuavanaboghava, egha zuamira nguazir kamin nguibaba bar an aka. Egha Satan kamaghin Iesus migei, “Bizir kaba nan agharimin iti, kamaghin amizima ki tina daningsi fueghiva, a daningam. Kamaghin ki nguibar kabar ganamin gavgavim ko, dar bizir aghuiba ni daningam. Eghti ni

tevimning apirigh nan ziam fiti, bizir kaba bar nina.”

Ezi Iesus kamaghin an akam ikara, “Godin Akinafarim kamaghin migei, ‘Ni uan Ekiam God, ni an apengara iki an ziamra fam.’ ”

Ezima Satan Iesus inighava Jerusalemin ghughava a isava Godin Dipenim pin mar anefa. Egha a kamaghin a migei, “Godin Akinafarim kamaghin migei, ‘A ni bagh uan enselbar mikemeghtima me deraghvira nin ganam, egh me uan dafaribar ni feghtima ni dagiatam uan dagarim aseghan kogham!’ Kamaghin amizima ni guizbangira Godin Otarim, ni kagh iki uabi ekunigh.”

Ezi Iesus an akam ikara, “Godin Akinafarim kamaghin migei, ‘Ni uan Ekiam God a gifar, a gakaghonti, a nin nighnizimin gin mangan marki.’ ”

Ezi Satan ifavarir kaba bar Iesus gamigha givagha anetaki. A Iesus ategha ghua dughiar igharazim bagha mizuai.

Kar, Krai Iesusin Akar Aghuim.

